



REPUBLIKA E KOSOVËS - REPUBLIKA KOSOVA - REPUBLIC OF KOSOVO
KËSHILLI GJYQËSOR I KOSOVËS - SUDSKI SAVET KOSOVA - KOSOVO JUDICIAL COUNCIL
PANELI ZGJEDHOR PËR ANKESA DHE PARASHTRESA
IZBORNI PANEL ZA ŽALBE I PREDSTAVKE - ELECTION COMPLAINTS AND APPEALS PANEL

A.nr. 586/2025

PANELI ZGJEDHOR PËR ANKESA DHE PARASHTRESA, në panelin e përbërë nga gjyqtarët: Hajriz Hoti kryesues, Violeta Husaj Rugova dhe Bujar Muzaqi anëtarë, duke vendosur lidhur me ankesën e Subjektit Politik, Partia Demokratike e Kosovës (PDK), me seli në Prishtinë, të paraqitur kundër, Komisionit Qendror të Zgjedhjeve (KQZ), me seli në Prishtinë, për shkak të parregullsive në ditën e votimit për Zgjedhjet e Përgjithshme të Kuvendit të Republikës së Kosovës, të mbajtura më datë 09 Shkurt 2025, në seancën e panelit të mbajtur më datë 13.02.2025, merr këtë,

V E N D I M

Hedhet e palejuar ankesa A.nr.586/2025, e datës 11.02.2025, e parashtruar nga Subjekti Politik, Partia Demokratike e Kosovës (PDK), me seli në Prishtinë, paraqitur kundër Komisionit Qendror të Zgjedhjeve (KQZ), me seli në Prishtinë, për shkak të parregullsive në ditën e votimit për Zgjedhjet e Përgjithshme të Kuvendit të Republikës së Kosovës, të mbajtura më datë 09 Shkurt 2025.

A r s y e t i m

PZAP-i më datë 11.02.2025, ka pranuar ankesën Anr.586/2025, nga Subjekti Politik Partia Demokratike e Kosovës (PDK), me seli në Prishtinë, paraqitur kundër Komisionit Qendror të Zgjedhjeve (KQZ), për shkak të parregullsive në ditën e votimit, për Zgjedhjet e Përgjithshme të Kuvendit të Republikës. Në ankesë pretendohet se më datë 09 Shkurt 2025, pas numërimit të kutive të votimit në vendvotimet 2508/1, 2508/5, 2501/10, 2501, 2508 në Komunën e Ferizajt, komisionerët përkatës kanë gabuar në numërimin e votave të Partisë Demokratike të Kosovës (131), ashtu që votat e subjektit politik PDK, janë shënuar tek subjektit politik Yenilikçi Türk Hareket Partisi, me numër 130, me ç' rast ka rezultuar në përshkrimin e gabuar të rezultateve të votimit për më tepër se 305 vota. Si provë në ankesë ka bashkangjitur Rezultatet Preliminare të publikuar në vendvotimet përkatëse nga Komisioni Qendror i Zgjedhjeve. Lidhur me këtë rrethanë janë informuar nga vëzhguesit dhe komisionerët e tyre në vendvotime.

Në përgjigje në ankesë të paraqitur me datë 12.02.2025, nga Komisioni Qendror i Zgjedhjeve (KQZ) theksohet se parregullsitë gjatë numërimit të votave në vendvotimet 2508 dhe 2501 në Komunën e Ferizajt dhe ndaj publikimit të rezultateve preliminare të datës 10 shkurt 2025 në

platformën elektronike dhe pasqyrimin jo të drejtë të votave Zgjedhjet për Kuvendin e Republikës së Kosovës, të mbajtura më 09 shkurt 2025.

KQZ, pas shqyrtimit të ankesës dhe pretendimeve të palës ankuese në lidhje me kërkesën e juaj jep sqarimet përgjigjet si më poshtë: Komisioni Qendror i Zgjedhjeve (KQZ), bazuar në Ligjin Nr.08/L-228 për Zgjedhjet e Përgjithshme në Republikën e Kosovës neni 102 paragrafi 5 ka bërë përmbledhjen e rezultateve preliminare (paraprake) të vendvotimeve dhe i bën publike përmes platformës elektronike me datën 10.02.2025. Më tej në përgjigje theksohet se rezultatet preliminare nga vendvotimet mund të ndryshohen, korrektohen dhe plotësohen, nga Qendrën Komunale të Numërimit (QKN) dhe Qendra e Numërimit dhe Rezultateve (QNR), e cila mundëson në evitimin e çdo gabimi teknik pas publikimit të rezultateve përfundimtare të këtyre zgjedhjeve nga KQZ-ja edhe të vendvotimeve të specifikuar nga ankuesi nëse konstatohet gjatë procesimit në QKN se ka pasur parregulltës. Bazuar në Rregullën Zgjedhore Nr.13/2024 Rezultatet e Zgjedhore nenin 9 paragrafi 1 thekson se: Në rast të mospërputhjes së rezultateve, KQZ-ja mund të urdhëroj rinumërimin e votave të cilit do VV, ose edhe përsëritjen e votimit në një VV apo QV.

PZAP-i, pas shqyrtimit paraprak të ankesës, vëren se ankesa është e palejuar.

Paneli vlerëson se pretendimi i palës ankuese edhe pse i referohet parregullsisë në ditën e votimit, për shkak se përmes kësaj ankese atakohet rezultati i cili ende nuk është shpallur si rezultat preliminar nga KQZ, e i cili rezultat mund të ndryshoj, dhe se ankesa në këtë fazë të procesit zgjedhor është e parakohshme, për shkak se pas publikimit të rezultatit përfundimtar i njëjti rezultat është i ankueshëm nga subjektet politike edhe kandidatët të cilët kanë pretendime në raport me numrin e votave të tyre. Meqenëse në aspektin kohor, faza e procesit zgjedhor kur parashtrohet ankesa është e parakohshme ankesa duhet të hedhet poshtë si e palejueshme.

Në momentin e publikimit të rezultatit përfundimtar nga KQZ-ja, palët e pakënaqura në pajtim me nenin 105.1 të Ligji Nr.08/L-228 Për Zgjedhjet e Përgjithshme në Republikën e Kosovës, ankesat lidhur me administrimin e numërimit në QKN dhe QNR, dorëzohen me shkrim pranë PZAP-së brenda dyzet e tetë (48) orëve nga ndodhja e shkeljes së supozuar.

Bazuar në arsyet e dhëna më lart, dhe në kuptim të nenit 118.1 të LQP-së, i cili përcakton se *“PZAP-i, pranon ankesat e bazuara në fakte dhe refuzon ankesat të cilat nuk i përmbushin kriteret e miratuara paraprakisht”*, dhe Nenit 13.3 të Rregullores Nr.01/2024 për Procedurat e Parashtrimit dhe Vendosjes së Ankesave të PZAP-it, në të cilin përcaktohet se *“PZAP-i, e hedhë ankesën kur vlerëson se ajo nuk përmbush kërkesat e LQP-së dhe kësaj rregullore për shqyrtim”*, lidhur me ankesën e lartë përmendur vendosi si në dispozitiv të këtij vendimi.

Vendosja sikurse në dispozitiv të këtij vendimi për hedhjen e ankesës si të palejueshme nuk e paragjykon rezultatin përfundimtar, e po ashtu me të njëjtat pretendime ankimore pala mund ta atakoj rezultatin përfundimtar.

Prandaj, nga arsyet e theksuara më lartë, e në kuptim të nenit 118.1 të LZP-së, dhe 13.3 Rregullores Nr.01/2024 për Procedurat e Parashtrimit dhe Vendosjes së Ankesave të PZAP-it, paneli vendosi si në dispozitiv të këtij vendimi.

Paneli Zgjedhor për Ankesa dhe Parashtrësia

A nr. 586/2025 datë 13.02.2025



Këshillë Juridike: Kundër këtij vendimi është e lejuar ankesa sipas nenit 118 paragrafi 4 të LZP-së, në Gjykatën Supreme të Kosovës, brenda dyzet e tetë (48) orëve nga momenti i marrjes-pranimi të këtij vendimi.